

# Jonihomi Utipiho Kapihotihi Kapiho

## Kimandi 3 Jonihopi Utipimandapi Nesipihande

Kiraisihomi isihiya usaisi iwinjatisiho mitiho ami mitiho wo Kiraisihomi isihiya usaisi iwinjatisiho komi ambipati Gaiyaasihopi kimandi utipimandi jipatipiyati nusoaasataise. Gaiyaasiho Kiraisihomi isihiya usaisi iwitatamasihikandapi Joniho Gaiyaasihomi ambipati niwimaataise. Iyati Gaiyaasiho utaahto wo komi ambipati Diyotirepesihopi jatinati bitoitandi kaundataase.

### Nyahi Isihiya Autaahaatihomi Otipipati Kawitaatiwi Iwitatamanitihawo

<sup>1</sup> Nini gwinyaahonini mitihonini isihiya Kiraisihopi gwinyaahohiyihiyai iwinjaati bimohihonini kinyi Gaiyaasihonyapi kimandi utipimandi jipatipiyataayo. Iyataati nini gisi maariho akitinihi nahinyataayo. <sup>2</sup> Naisohone, kinyapi ko Kiraisihomihireti komi maariho gaatihu nga biyati bindataise ndi nini gwinyaataayo. Saindi gwinyaataati ami kinyi ambipatisangi gaatanihi bimitaapi nini Autaahaatihopi gaapundataayo. Aindi ami kinyi kaingiwaiwa titihi noaipati gaatitandi ami ahoyati gaapundataayo. <sup>3</sup> Iyataati isihiya naisihiya usa Kiraisihopi gwinyaahohiyihiya kimbihini ningisaapihi napiwi noaipawaayopo. Napiwi noaipapi kinyapi ko Autaahaatihomi piwiha akaahaamihireti titihi japepihirati Autaahaatihomi piwihaapi akaahaare tati biyati ausaataati isihiyaami piwiha jaiwitiwiha ausaahohihai ipihatisamahore tauhi atisataayo. Atisataati apipaahi aungwohandi maaritataayo. <sup>4</sup> Iyataati sahi nisi metihonyaati Autaahaatihomi piwiha akaahaamihireti titihi japepihirisaihi atisataataahi nini aungwohandi maaritito. Iyataati nisi maaritohitimandi windi nusatipihaati awaindihandi maarititandihandi owetitaise.

### Kima Piwima Gaiyaasiho Otipipati Gaahati Kaipatapihaare

<sup>5</sup> Nisi naisohonji nini gisi maariho apipaahi awaindihandi nahinyohihone, isihiya Kiraisihopi gwinyaahohiyihiyaisuni ami

isihya usaisi kiya gisi napiwi ginjihauhi kinyi kiyai iwitatamanipi anditiwipi gaahati kawingitihandi sandi gaahandi kiyapaise. <sup>6</sup>Iyataati isihya siya Kiraisihopi giwunyaahohiyihya gi napiwi ginjahauhi kinyi kiyaisi maariho nunyapi kaingiwaiwaapi siyahore siyahore tiwi kimbihapihyaanangi kanyatauhi atisahaayo. Isi isihya siya ami ipotisangi waara napiwi ginjasaihaahi Autaahaatihomi otipipati kaiwi daayawaahiyaasi naasipiti kati kaimbi sihisangi iwitatamanipi anditiwipe. Aimbikiya daihira nowaawi nandapa nandaatiwihapa anditiwipi nunyapaapaahi sandi gaare ami sandapi Autaahaatiho maaritataiso. <sup>7</sup>Iyataati isihya siya Kiraisihomi otipipati kaiwi daayawaahiyaare. Isi isihya Kiraisihopi windi gimaawunyaahohiyihya nandapa ami wapa ikipipa numwisaihihapa kiya windi namaitaapo. <sup>8</sup>Isi nyahi Kiraisihopi giwunyaahohiyihyaanini isihya saiwi otipipati kaiwi daayohiyihyai iwitatamanaati anditiwiwitihawe. Siyaati kiyahaawaahi piwiha akaahaami Tanyaahomi otipipati mikandi maasi kiyahaayo.

#### **Kima Piwima Daiyotirepisiho Maipihandi Kaindihandapihaare**

<sup>9</sup>Iyataati sahi Kiraisihopi giwunyaahohiyihyaatangi saiwi saiwi itatamaniniwi bimaawise satiti utipihandi aimi jipatipaindi nusoasataayo. Saindi utipihandi jipatipaindi nusoasonihandi kandi Daiyotirepisiho nisi piwiha windi atihomaanisataise. Atihomaanisati ko siyati gwinyaataise, isihya Kiraisihopi giwunyaahohiyihyai nini noaipati awaisihoninimandi iwinjaati bimitaano tati gwinyaataise. Siyati gwinyaataati nisi piwiha ko atinisati nisi otitih windi bimimise. <sup>10</sup>Isi nini sangisenda nasataataahi ko nisapi maipihaiwa katati sisipihitwaiwaapi ko sawaho Daiyotirepisiho atisonihi sata sata katati siya kiyahoe ndi sangi ausaati kasatito. Iyati ko nehi saiwaahihiki kiyataamaise. Owetise. Ami wiwa siyihaiwa kiyataise. Isihya Autaahaatihomi piwiha ausaapi daayohiyihyai nisi anjipipihiki napiwise undati piwaundati gerundati numwaataamaise. Owe. Iyati ami ko windi siyahandi kiyataise, isihya Autaahaatihomi otipipati kaiwi daayohiyihyai kapihapihya piwaundiwi kiyaami anjipipihapi numwaasi naitotiwiyauhi ko saundataase, sahi isihya siyai piwaundiwi namumwaapise undati kaundataase. Iyati isihya maaritwi Autaahaatihomi otipipati kaiwi daayohiyihyai kiyaami anjipipihiki numwaapi yainjaraawisohiyihyai Kiraisihopi giwunyaahohiyihyaamihatihapi neti yatihemahore.

<sup>11</sup>Nisi naisohonji akohonji nini gi nisi maariho nahinyohihone, maipihaiwa japepihiripi kaiwa kamaime. Owetane. Nehi titihi gaahaiwa japepihiripi gaahaiwa gaahireti kaime. Utaaho wo titihi gaahandi kaisiho so Autaahaatihomihore. Utaaho wo maipihandi titihimetihandi kaisiho so Autaahaatihopi windi atimisati monahore. <sup>12</sup>Iyataati

Demitiriyaasihopi isihiya nahatiya ko titihi gaaho ainahihore tiwi katawaatopo. Iyataati ami ko piwiha akaahaamihireti japepihirati kaindihandaahi kopi titihi gaahore tati neti nanyisataise. Aihi ningisangi kopi titihi nisi piwiha nahatewa katohiwaiwa jaiwitaahaiwaamaahe. Titihi akaahaasi Demitiriyaasihopi katohihaisangi akite tipi gwinyaitaise.

### **Piwiha Ipotihaare**

<sup>13</sup>Nini gisi piwiha pihindi kahititi jipatipaitihati kandi kimandi utipimandaatihi windi waati jipatipimaayo. <sup>14</sup>Piwiha gisi pihindi kahititi jipatipimaayotimandi apaapimaaha. Nini gisi napiti gisoniti piwiha kahititi kaitandihandapi gwinyapenataati piwiha pihindi kahititi jipatipimaayo. <sup>15</sup>Isi kinyi maariho napaisaatitonihini kinyi timbipa windi namepi baimbi bime. Kinyi naisihiya kimbihiya gi ipihirete hitawaatopo. Isi naisihiyai Joniho sangi ipihirete satataase undipi ninaasiyaisi yiyandihi kaunde.

Kima piwima nini Jonihonini jipatipiyataayo.